

四庫全書

經部

# 欽定四庫全書

經部

四書纂疏中庸卷三

詳校官大理寺卿臣富炎奏

刑部郎中臣許兆椿覆勘

總校官原任中允臣王燕緒

校對官典簿臣郭祚熾

謄錄監生臣查浩

欽定四庫全書

中庸纂疏卷三

宋 趙順孫 撰

朱子章句

自誠明謂之性自明誠謂之教誠則明矣明則誠矣

自由也德無不實而明無不照者聖人之德所性而

有者也天道也先明乎善而後能實其善者賢人之

學由教而入者也人道也

焉錄曰此性謂是性之也此教字是學知也此一字

却是轉一轉說與前章天爵之謂性修道之謂教二字義不同。葉氏曰聖人全體無一不實而明睿所

照無一不盡此自誠而明也學者先明乎善無不精  
察故踐履之際始無不實此自明而誠也謂之性者  
全於天之賦予謂之教者成於己之學習。三山陳  
氏曰自誠明者由其內全所得之實理以照事物如  
天開日明自然無蔽此性之所以名天之道也自明  
誠者由窮理致知去其私欲以復全其所得之實理  
必由學而能此教之  
所以立人之道也 誠則無不明矣明則可以至於  
誠矣 語錄曰以誠而論明則誠明合而為一以明而  
論誠則誠明分而為二。三山陳氏曰自誠明  
者誠即明也非曰誠而後至於明自明誠者  
尚須由明而後至於誠雖然及其成功一也

右第二十一章子思承上章夫子天道人道之意

而立言也

語錄曰中庸言天道處皆自然無  
節次言人道處皆有下功夫節次自此

以下十二章皆子思之言以反覆推明此章之意

或問誠明之說曰程子諸說皆學者所傳錄其以

内外道行為誠明似不親切

案程子曰自其外者學之而得於內者謂

之明自其內者得之而兼於外者謂之誠誠與明一也。又曰孔子之道發而為行如鄉黨之所載者自誠而明也由鄉黨之所載而學之以至於孔子者自明而誠也及其至焉一也唯先明

諸心一條以知語明以行語誠為得其訓乃顏子

好學論中語而夫子之手筆也亦可以見彼記錄

者之不能無失矣

案程子曰君子之學必先明諸心知所養然後力行以求至所

謂自明而誠也故學必盡其心知其性然後反而誠之則聖人也

張子蓋以性教

分為學之兩塗而不以論聖賢之品第故有由誠

至明之語程子之辨雖已得之然未究其立言本

意之所以失也其曰誠即明也恐亦不能無誤

張

子曰自誠明者先盡性以至于窮理也謂先自其性理會來以至於理自明誠者先窮理以至於盡性也謂先從學問理會以推達于天性也。程子曰張子言由明以至誠此句却是言由誠以至明則不然誠即明也

呂氏性教二字得之而於誠字以至簡

至易行其所無事為說則似未得其本旨也且於性

教皆以至於實然不易之地為言則至於云者非所以言性之之事而不易云者亦非所以申實

然之說也

案呂氏曰自誠明性之者也自明誠反之者也性之者自成德而言聖人之所

性也反之者自志學而言聖人之所教也成德者至于實然不易之地理義皆此出也天下之理如目睹耳聞不慮而知不言而喻此之謂誠則明志學者致知以窮天下之理則天下之理皆得卒亦至於實然不易之地至簡至易行其所無事此之謂明則誠然其過於游楊則

遠矣

案游氏曰自誠明由中出也故可名於性自明誠自外入也故可名於教誠者因性故無

不明明者致曲故能有誠。楊氏曰自誠而明天之道也故謂之性自明而誠人之道也故謂之教

天人一道而心之所至有差焉其歸則無二致也故曰誠則明矣明則誠矣

唯天下至誠為能盡其性能盡其性則能盡人之性能盡人之性則能盡物之性能盡物之性則可以贊天地之化育可以贊天地之化育則可以與天地參矣

天下至誠謂聖人之德之實天下莫能加也

文集曰至誠之

至乃極至之至如至道至德之比。陳氏曰至誠兩字乃是真實至極而無一毫之不盡惟聖人乃可當之。葉氏曰至誠者蓋聖人之全德無一之不實而極其至之謂舉天下無以加亘古今莫能及者也

盡其性者德無不實故無人欲之私而天命之在我



者察之由之巨細精粗無毫髮之不盡也

語錄曰且如十件事

能盡得五件而五件不能盡亦是不能盡如兩件事盡得一件而一件不能盡亦是不能盡只這一事上能盡其初而不能盡其終亦是不能盡能盡於蚤而不能盡於莫亦是不能盡。陳氏曰知無不盡而行亦無不盡朱子謂

察之由之是也

人物之性亦我之性但以所賦形

氣不同而有異耳能盡之者謂知之無不明而處之

無不當也

語錄曰盡人物之性非特是曉得盡亦是要處之盡其道凡所以養人教人之政與

夫利萬物之政皆是也

贊猶助也與天地參謂與天地並立為

三也

語錄曰若只明得盡如何得與天地參去這一箇是無不得底故與天地參而為三

此自

誠而明者之事也

右第二十二章

言天道也

或疑二十章以後天道人道間見迭出永嘉陳氏曰道理縱橫說之無

盡如何立定樣範只合逐章體認如天道入道纔不費力處便是天道纔著力便是人道

或問至誠盡性諸說如何曰程子以盡已之忠盡

物之信為盡其性蓋因其事而極言之非正解此

文之意今不得而錄也

宋程子曰盡已為忠盡物為信極言之則盡已者盡

已之性也盡物者盡物之性也信者無偽而已於天性有所損益則為偽矣

其論贊天

地之化育而曰不可以贊助言

案程子曰贊者參贊之義先天而天

弗違後天而奉天時之類也非謂贊助只有一箇誠何助之有

論窮理盡性以至

於命而曰只窮理便是至於命

案程子曰如言窮理以至於命以序

言之不得不然其實只是窮理便能盡性至命也

則亦若有可疑者蓋嘗

竊論之天下之理未嘗不一而語其分則未嘗不殊

此自然之勢也蓋人生天地之間稟天地之氣其

體即天地之體其心即天地之心以理而言是豈

有二物哉故凡天下之事雖若人之所為而其所

以為之者莫非天地之所為也又況聖人純於義理而無人欲之私則其所以代天而理物者乃以天地之心而贊天地之化尤不見其有彼此之間也若以其分言之則天之所為固非人之所及而人之所為又有天地之所不及者其事固不同也但分殊之狀人莫不知而理一之致多或未察故程子之言發明理一之意多而及於分殊者少蓋抑揚之勢不得不然然亦不無小失其平矣

曰人在天地中間雖只是一理然人做得底却有天做不得底如天能生物而耕種必用人水能潤物而灌溉必用人火能煖物而薪爨必用人財成輔相須是人做非贊助而何程子言參贊之義非謂贊助此

說非是

唯其所謂止是一理而天人所為各自

有分乃為全備而不偏而讀者亦莫之省也

案程子曰

自人而言之從盡其性至盡物之性然後可以贊天地之化育可以與天地參矣言人盡性所造如是若只是至誠更不須論所謂人者天地之心及天聰明止謂只是一理而天人所為各自有分

至於窮理至命盡人盡物之說則程張之論雖有不同然亦以此推之則其說初亦未嘗甚異也蓋

以理言之則精粗本末初無二致固不容有漸次  
當如程子之論若以其事而言則其親疎近遠深  
淺先後又不容於無別當如張子之言也

案張子曰二程

解窮理盡性以至於命只窮理便是至於命亦是  
失於太快此義儘有次序須是窮理便能盡得已  
之性既盡得已之性則推類又盡人之性既盡得  
人之性須是并萬物之性一齊盡得如此然後至  
於天道也其間然有事宜有當下理會都了學者須  
是窮理為先如此則方有序今言知命與至於命  
儘有近遠豈可以  
知便謂之至也

呂游楊說皆善而呂尤確實楊

氏萬物皆備云者又前章格物誠身之意然於此

論之則反求於身又有所不足言也胥失之矣

呂案

氏曰至於實理之極則吾生之所固有者不越乎是吾生所有既一於理則理之所有皆吾性也人受天地之中其生也具有天地之德柔強昏明之質雖異其心之所然者皆同特蔽有淺深故別而為昏明稟有多寡故分而為強柔至於理之所同然雖聖愚有所不異盡已之性則天下之性皆然故能盡人之性蔽有淺深故為昏明蔽有開塞故為人物稟有多寡故為強柔稟有偏正故為人故物之性與人異者幾希惟塞而不開故知不若人之明偏而不正故才不若人之美然人有近物之性者物有近人之性者亦繫乎此於人之性開塞偏正無所不盡則物之性未有不盡也己也人也物也莫不盡其性則天地之化幾矣故行其所無事順以養之而已是所謂贊天地之化育者

也如堯命羲和欽若昊天至於民之析因夷陰鳥獸之孽尾希革毛毳毼毛無不與知則所贊可知矣天地之化育猶有所不及必人贊之而後備則天地非人不立故人與天地並立為三才此之謂與天地參。游氏曰萬物皆備於我矣反身而誠樂莫大焉故惟天下至誠為能盡其性千萬人之性一已之性是也故能盡其性則能盡人之性萬物之性一人之性是也故能盡人之性則能盡物之性同焉皆得者各安其常則盡人之性也至於盡物之性則和氣充塞故可以贊天地之化育夫如是則天覆地載教化各任其職而成位乎其中矣。楊氏曰性者萬物之一源也非夫體天德者其孰能盡之能盡其性則人物之性斯盡矣言有漸次也贊化育參天地皆其分內耳。又曰孟子曰萬物皆備於我則數雖多反而求之於吾身可也故曰盡已之性則能盡人之性盡人之性則能



盡物之性以已與  
人物性無二故也

其次致曲曲能有誠誠則形形則著著則明明則動動則變變則化唯天下至誠為能化

其次通大賢以下凡誠有未至者而言也

陳氏曰此說大賢以

下性之全體未至如聖人之渾然無欠闕者也

致推致也

語錄曰凡事皆當推致其理如事父

母便來這裏推致其孝事君便推致其忠交朋友便推致其信

曲一偏也

語錄曰曲不是全體

只是一偏之善形者積中而發外

陳氏曰和順積中而英華發外便是形見

著則

又加顯矣

語錄曰如見而盎背是著

明則又有光輝發越之盛也

陳氏曰此明字却與誠則明之意又別彼明字是宵中通明無所不照之謂此乃充實而有輝光之明矣

動者誠能動物變者物從而變化則有不知其所以

然者

語錄曰動是方感動他變則已改其舊俗然尚有痕迹在化則都消化了無復痕迹矣

蓋

人之性無不同而氣則有異故惟聖人能舉其性之

全體而盡之其次則必自其善端發見之偏而悉推

致之以各造其極也

語錄曰人所稟各有偏善或稟得剛強或稟得和柔各有一偏

之善能一一推之以至乎其極則能貫通乎全體矣

○又曰是隨其善端發見於此使自此上推致以造其極發見於彼便就彼上推致以造其極非是止就其發見一處推致之也如從此惻隱處發便從此發

見處推至其極從羞惡處發便就此發見處推至其極曲無不致則德無不實

而形著動變之功自不能已積而至於能化則其至

誠之妙亦不異於聖人矣

陳氏曰自形著至變化以致曲之效言之至此則入

道極其至亦如天之道也

## 右第二十三章

言人道也

或問致曲之說曰人性雖同而氣稟或異自其性而言之則人自孩提聖人之質悉已完具以其氣

而言之則唯聖人爲能舉其全體而無所不盡上  
章所言至誠盡性是也若其次則善端所發隨其  
所稟之厚薄或仁或義或孝或弟而不能同矣自  
非各因其發見之偏一一推之以至乎其極使其  
薄者厚而異者同則不能有以貫通乎全體而復  
其初即此章所謂致曲而孟子所謂擴充其四端  
者是也

語錄曰問既是四端安得謂之曲曰四端  
先後互發豈不是曲孟子云知皆擴而充

之則是可見若謂只有此一曲則是夷惠之偏如  
何得該徧聖人具全體一齊該了而當用時亦只

是發一端如用仁則義禮智如何上來得問雖發一端然其餘只平鋪在要用即用不似以下人有待後間斷之意須程子之言大意如此

案程子曰人自孩提

聖人之質已完只先於偏勝處發或仁或義或孝或弟去氣偏處發便是致曲去性上修便是直養然同歸于誠。語錄曰問程子說從一偏致曰須件件致去如孝弟須件件致得到誠孝誠弟處如仁義須件件致到但其所論不詳且以由基之射

為說

案程子曰曲偏曲之謂非大道也曲能有誠就一事中用志不分亦能有誠且如技藝上

可見如養由基射之類是也

故有疑於專務推致其氣質之所

偏厚而無隨事用力悉有衆善之意

語錄曰問程子說致曲先

於偏勝處發似未安如此則專主一偏矣曰又以  
此說甚可疑須於事上論不當於人上論

形為參前倚衡所立卓爾之意則亦若以為已之  
所自見而無與於人也豈其記者之略而失之與

至於明動變化之說則亦無以易矣

案程子曰誠則形誠後便

有物如立則見其參於前在輿則見其倚於衡如  
有所立卓爾皆若有物方見如無形是見何物也  
形則著又著見也著則明是有輝光之時也明則  
動誠能動人也君子所過者化豈非動乎或曰變  
與化何別曰變如物方變而未化化則更無  
舊迹自然之謂也莊子言變大於化非也

若張

子之說以明為兼照動為徙義變為通變化為無

滯則皆以其進乎內者言之失其指矣蓋進德之  
序由中達外乃理之自然如上章之說亦自己而  
人自人而物各有次序不應專放內而遺其外

也且夫進乎內之節目亦安得如是之繁促哉

案張子曰致曲

不貳則德有定體體象誠定則文節著見一曲致  
文則餘善兼照明能兼照則必將徙義誠能徙義  
則德自通變能通  
其變則圓神無滯游氏說亦得之但說致曲二字

不同非本意耳

案游氏曰誠者不思不勉直心而  
徑行也其次則臨言而必思不敢

縱言也臨行而必擇不敢徑行也故曰致曲曲折  
而反諸心也擬議之間鄙詐不萌而忠信立矣故

曲能有誠有諸中必形諸外故誠則形形於身必著於物故形則著誠至於著則內外洞徹清明在躬故著則明明則有以動衆故明則動動則有以易俗故動則變變則革汚以為清革暴以為良然猶有迹也化則其迹泯矣日用飲食而已至於化則神之所為也非天下之至誠孰能與於此楊

氏既以輝光發外為明矣而又引明則誠矣則似以明為通明之明既以鶴鳴子和為動矣而又曰化非學問篤行所及則似以化為大而化之之化此其上下文意不相承續且於明動之間本文之外別生無物不誠一節以就至誠動物之意尤不



可曉今固不能盡錄然亦不可不辨也

案楊氏曰能盡其性

者誠也其次致曲者誠之也學問思辨而篤行之致曲也用志不分故能有誠誠於中形於外參前倚衡不可揜也故形形則有物故著著則輝光發見於外故明明則誠矣未有誠而不動動而不變也鳴鶴在陰其子和之非動乎曲能有誠誠在一而也明則誠矣無物不誠也至於化則非學問思辨篤行之所及也故惟天下至誠為能化

至誠之道可以前知國家將興必有禎祥國家將亡必有妖孽見乎蓍龜動乎四體禍福將至善必先知之不

善必先知之故至誠如神

見音現

禎祥者福之兆妖孽者禍之萌著所以筮龜所以卜  
四體謂動作威儀之間如執玉高卑其容俯仰之類  
凡此皆理之先見者也然唯誠之至極而無一毫私  
偽留於心目之間者乃能有以察其幾焉

語錄曰在我無一毫

私偽故常虛明自能見得如禎祥妖孽與著龜所告  
四體所動皆是此理已形見但人不能見耳聖人至  
誠無私偽所以自能見得且如著龜所告之吉凶甚  
明但非至誠人却不能見也○愚謂天地萬物不離  
一氣興亡之證見於妖孽卜筮動作之間禍福之來  
亦逆知其善否者非異也氣之感召理之當耳惟誠  
之至者無一毫之不實則萬物兆朕無不形見  
否則已然之事且不覺悟尚何能察其幾哉

右第二十四章

言天道也

或問至誠如神之說曰呂氏得之矣其論動乎四

體為威儀之則者尤為確實

案呂氏曰至誠與天地同德與天地同德

則其氣化運行與天地同流矣與亡之兆禍福之來感於吾心動於吾氣如有萌焉無不前知況乎誠心之至求乎蓍龜而蓍龜告察乎四體而四體應所謂莫見乎隱莫顯乎微者也此至誠所以達乎神明而無間故曰至誠如神動乎四體如傳所謂威儀之則以定命者也

游氏心合

於氣氣合於神之云非儒者之言也且心無形而

氣有物若之何而反以是為妙哉

案游氏曰至誠之道精一無間

心合於氣氣合於神無聲無臭而天地之間物莫得以適其形矣不既神矣乎

程子用便

近二之論蓋因異教之說

案程子曰人固可以前知然其理須是用則知

不用則不知知不如不知之愈蓋用便近二所以釋子謂又不是野狐精也

如蜀山人

董五經之徒亦有能前知者

案程子曰蜀山人不起念十年便能前知

○又嵩前有董五經隱者也程子聞其名謂其亦窮經之士持往造焉董平日未嘗出是日不值還至中途遇一老人負茶果以歸且曰君非程先生乎程子異之曰先生欲來信息甚大某特入城置少茶果將以奉待也程子以其誠意復同至其舍語甚款亦無大過人者但久不與物接心靜而明

也故就之而論其優劣非以其不用而不知者為

真可貴而賢於至誠之前知也至誠前知乃因其  
事理朕兆之已形而得之如所謂不逆詐不億不  
信而常先覺者非有術數推驗之煩意想測度之  
私也亦何害其為一哉

誠者自成也而道自道也

道也之  
道音導

言誠者物之所以自成而道者人之所當自行也

語錄

曰誠者是箇自然成就底道理不是人去故作安排  
底物事道却是箇無情底道理却須是人自去行始

得。又曰誠者自成如這箇草樹所以有許多根株枝葉條幹者是自實有底如人便有耳目鼻口手足百骸都是你自實有底道雖是自然底道理然却須你自去做始得誠以心言本也錄  
曰問既說物之所以自成又云誠以心言莫是心者物之所存主處不曰誠以心言者是就一物上說凡物必有是心有是心然後有是事道以理言用也

誠者物之終始不誠無物是故君子誠之為貴

天下之物皆實理之所為故必得是理然後有是物

語錄曰有是理則有是物徹頭徹尾皆是此理所為未有無此理而有此物也所得之理既

盡則是物亦盡而無有矣

文集曰凡有一物則其成也必有所始其壞也必有

所終而其所以始者實理之至而向於有也其所以終者實理之盡而向於無也若無是理則亦無是物矣  
故人之心一有不實則雖有所為亦如無有

語錄曰且如而今對人說話若句句說皆自心中流出這便是有物若是脫空誑誕不說實話雖有兩人相對話其實如無物也。陳氏曰凡人做事自頭徹尾純是一箇真實心方有此一箇物若此心間斷無誠實雖做此一件事如不做一般而君子必以誠為貴也蓋人之心

能無不實乃為有以自成而道之在我者亦無不行矣

誠者非自成已而已也所以成物也成已仁也成物知

也性之德也合外內之道也故時措之宜也

知去聲

誠雖所以成已然既有以自成則自然及物而道亦

行於彼矣

語錄曰誠雖所以成已然在我真實無偽自然及物

仁者體之存智

者用之發是皆吾性之固有而無內外之殊

陳氏曰仁之體

在我者也知之用見於外者也仁與知皆非外物乃性之所固有者性之所有無內外之間

既得

於已則見於事者以時措之而皆得其宜也

語錄曰成已成

物固無內外之殊但必先成已然後能成物此道之所以當自行也

右第二十五章



言人道也

或問二十五章之說曰自成自道如程子說乃與

下文相應

案程子曰誠者自成如至誠事親則成人子至誠事君則成人臣。又曰學者

不可以不誠雖然誠者在知道本而誠之耳

游楊皆以無待而然論之

其說雖高然於此為無所當且又老莊之遺意也

案游氏曰誠者非有成之者自成而已其為道非有道之者自道而已自成自道猶言自本自根也

○楊氏曰誠自成道自道無所待而然也誠者物之終始不誠無物之

義亦唯程子之言為至當然其言太略故讀者或

不能曉請得而推言之蓋誠之為言實而已矣然此篇之言有以理之實而言者如曰誠不可掩之類是也有以心之實而言者如曰反諸身不誠之類是也讀者各隨其文意之所指而尋之則其義各得矣所謂誠者物之終始不誠無物者以理言之則天地之理至實而無一息之妄故自古至今無一物之不實而一物之中自始至終皆實理之所為也

陳氏曰以造化言之如天地間生成萬物自古及今無一物之不實散殊上下自古

有是到今亦有是非古有而今無皆是實理之所為大而觀之自太始以至萬古莫不皆然若就物觀之其徹始徹終亦只是一實理如此姑以一株花論來春氣流注到則萌蘖生花春氣盡則花亦盡又單一就花藥論氣實行到此則花便開氣消則花便謝亦盡了方其花萌蘖此實理之初也至到謝而盡處此以心言之則聖人之心亦至實而實理之終也

無一息之妄故從生至死無一事之不實而一事

之中自始至終皆實心之所為也

陳氏曰自聖人論之合下天理

渾全真實無妄從生至死無一事之不實又就聖人做一事論之自始至終皆此心真實之理所為如祭義云其立之也敬以誦其進之也敬以愉其薦之也敬以欲退而立如將受命已徹而退敬齋

之色不絕於面此是祭之終始微音微尾皆一箇真實之心所為如此

此所謂誠者

物之終始者然也

潘氏曰出於誠則有始有終

苟未至於聖人

而其本心之實者猶未免於間斷

陳氏曰自大賢以下真實無妄

未能如聖人故本心之實處不能無間斷

則自其實有是心之初以至

未有間斷之前所為無不實者及其間斷則自其

間斷之後以至未相接續之前凡所云為皆無實

之可言雖有其事亦無以異於無有矣

語錄曰如人做事未

做得一半便棄了即一半便不成

如曰三月不違則三月之間所為皆

實而三月之後未免於無實蓋不違之終始即其事之終始也日月至焉則至此之時所為皆實而去此之後未免於無實蓋至焉之終始即其物

之終始也

陳氏曰如顏子三月不違仁在三月之內徹頭徹尾皆是一箇誠心若三

月之後則未免有間斷而不實矣故就三月不違言之其三月乃顏子為仁之終始其餘則日月至焉之外其間斷固多只就日月至處觀之其日月之間徹頭徹尾亦門人為仁之終始也。或疑事之終始與物之終始何別愚謂心不違仁就是事見故以事言至其境界是實地故以物言是則所謂不誠無物者然也

潘氏曰不誠則非惟無終而其始已非其有矣以

是言之則在天者本無不實之理故凡物之生於  
天者必有是理方有是物未有無其理而徒有不  
實之物者也在人者或有不實之心故凡物之出  
於心者必有是心之實乃有是物之實未有無其  
心之實而能有其物之實者也程子所謂徹頭徹  
尾者蓋如此

案程子曰誠者物之終始猶俗語徹頭徹尾不誠更有甚物也○葉氏曰

程子所謂徹頭徹尾便是不少間斷

其餘諸說大抵皆知誠之在天

為實理而不知其在人為實心是以為說太高而

往往至於交互差錯以失經文之本意正猶知愛之不足以盡仁而凡言仁者遂至於無字之可訓其亦誤矣呂氏所論子貢子思所言之異亦善而猶有未盡者蓋子貢之言主於知子思之言主於行故各就其所重而有賓主之分亦不但為成德入德之殊而已也

紫呂氏曰子貢曰學不厭智也教不倦仁也學不厭所以成已

此則成已為仁教不倦所以成物此則成物為智何也夫盡性以成已則仁之體也推是以成物則智之事也自成德而言也學不厭所以致吾知教不倦所以廣吾愛自入德而言也此子思子貢之

言所以異也

楊氏說物之終始直以天行二字為解蓋本於易終則有始天行也之說假借依託無所發明楊氏之言蓋多類此最說經之大病也又謂誠則形而有物不誠則輟而無物亦未安誠之有物蓋不待形而有不誠之無物亦不待其輟而後無也其曰由四時之運已則成物之功廢蓋亦輟而後無之意而又直以天無不實之理喻夫人有不實之心其取譬也亦不親切矣彼四時之運夫豈



有時而已者哉

案楊氏曰其為物終始天行也誠則形形故有物不誠而著乎偽則

有作輟故息息則無物矣由四時之運已則成物之功廢焉尚何終始之有故以習則不察以行則不著以進德則不可久以修業則不可大故君子唯誠之為貴

故至誠無息

既無虛假自無間斷

陳氏曰凡假偽底物久則易間斷真實則無間斷

不息則久久則徵

久常於中也徵驗於外也

語錄曰久然後有證驗只一日兩日工夫如何有證

驗。陳氏曰道理真積力久充實於內自然昭著於外如見面盎背之類乃是證驗處

徵則悠遠悠遠則博厚博厚則高明

此皆以其驗於外者言之

陳氏曰自徵以下至高明皆是實德驗於外處鄭

氏所謂至誠之德著於四方者是也

語錄曰此是言聖人功業曰徵

則悠遠至博厚高明無疆皆是功業著見如此故云德著于四方

存諸中者既久則

驗於外者益悠遠而無窮矣

語錄曰久是就他骨子裏說鎮常如此之意悠

是自今觀後見其無終窮之意

悠遠故其積也廣博而深厚博厚故

其發也高大而光明

語錄曰譬如為臺觀須是大做根基方始上面可以高大又如

萬物精氣蓄於下者深厚則其發越于外者自然光明

博厚所以載物也高明所以覆物也悠久所以成物也

悠久即悠遠兼內外而言之也

潘氏曰久是久於內悠是久於外○永嘉

陳氏曰不息則久是誠積於內微則悠遠是誠積於外下却變文為悠久則是兼上文內外而言本

以悠遠致高厚而高厚又悠久也

語錄曰問以存諸中者而言則悠久

在高明博厚之前見諸用者而言則悠久在博厚高明之後如何曰此所以為悠久也若始初悠久末稍不悠久便是不悠久矣○陳氏曰初頭本具悠遠方能至於高厚今又由高厚以至於悠久也此言

聖人與天地同用

博厚配地高明配天悠久無疆

此言聖人與天地同體

陳氏曰同用以功言同體以德言

如此者不見而章不動而變無為而成

見音現

見猶示也不見而章以配地而言也不動而變以配

天而言也無為而成以無疆而言也

陳氏曰不見而章是不待有所

示而功用自然章著此處與地一般不動而變動則猶有形迹至於不動則如天之變化萬物無形迹此處與天一般無為而成有所為而成尚有形迹無所為而成其功用至於悠久自不見其形迹此以悠久無疆言之也

天地之道可一言而盡也其為物不貳則其生物不測

此以下復以天地明至誠無息之功用天地之道可

一言而盡不過曰誠而已不貳所以誠也

陳氏曰不貳者純一

之意誠故不息

蔡氏曰不貳則無間斷所以不息

而生物之多有莫知

其所以然者

陳氏曰自開闢以至于今其生成萬物無有窮已蓋莫知其所以然

天地之道博也厚也高也明也悠也久也

言天地之道誠一不貳故能各極其盛而有下文生

物之功

今夫天斯昭昭之多及其無窮也日月星辰繫焉萬物

覆焉今夫地一撮土之多及其廣厚載華嶽而不重振  
河海而不洩萬物載焉今夫山一卷石之多及其廣大  
草木生之禽獸居之寶藏興焉今夫水一勺之多及其  
不測黿鼉蛟龍魚鼈生焉貨財殖焉

夫音扶華藏並去聲卷平聲勺市若

反

昭昭猶耿耿小明也此指其一處而言之及其無窮  
猶十二章及其至也之意蓋舉全體而言也

語錄曰管中所

見之天也是天德地大底只是天

振收也卷區也此四條皆以發明

由其不貳不息以致盛大而能生物之意

三山陳氏曰大意蓋

言天地聖人皆得此實理無有駁雜無有間斷始能有此功用耳

然天地山川實非

由積累而後大

語錄曰舉此全體而言則其氣象功效自是如此

讀者不以

辭害意可也

詩云維天之命於穆不已蓋曰天之所以為天也於乎不顯文王

之德之純蓋曰文王之所以為文也純亦不已

於音烏乎音呼

詩周頌維天之命篇於歎辭穆深遠也不顯猶言豈

不顯也

陳氏曰不顯者言甚顯也

純純一不雜也

真氏曰純是至誠無一毫人偽

之引此以明至誠無息之意

黃氏曰誠便是維天之命不息便是於穆不已

程子曰天道不已文王純於天道亦不已純則無二

無雜不已則無間斷先後

真氏曰惟其純誠無雜自然能不已如天之春而夏

夏而秋秋而冬晝而夜夜而晝循環運轉一息不停以其誠也聖人之自壯而老自始而終無一息之懈亦以其誠也既誠自然能不已

右第二十六章

言天道也

葉氏曰言聖人與天地合德是為天道

或問二十六章之說曰此章之說最為繁雜如游



楊無息不息之辨恐未然若如其言則不息則久

以下至何地位然後為無息耶

案游氏曰至誠無息天行健也若文

王之德之純是也未能無息而不息者君子之自強也若顏子三月不違仁是也○楊氏曰無息者誠之體也不息所以體誠也○語錄曰不息只如言無息游楊氏分無息為至誠不息所以體乎誠非是○葉氏曰雖變文云不息若就聖人至誠言之只是自然無息不可以不字為學者用力事也

游氏又以得一形容不貳之意亦假借之類也字

雖密而意則疎矣

案游氏曰其為物不貳天地之得一也一則不已故覆載萬物

雕刻衆形而莫知其端也故生物不測

呂氏所謂不已其命不已其

德意雖無爽而語亦有病蓋天道聖人之所以不  
息皆實理之自然雖欲已之而不可得今曰不已  
其命不已其德則是有意於不已而非所以明聖

人天道之自然矣

案呂氏曰天之所以為天不已其命而已聖人之所以為聖不

已其德而已其為天人德命則異其所以不  
已則一故聖人之道可以配天者如此而已又以

積天之昭昭以至於無窮譬夫人之充其良心以  
至於與天地合德意則甚善而此章所謂至誠無  
息以至於博厚高明乃聖人久於其道而天下化

成之事其所積而成者乃其氣象功效之謂若鄭氏所謂至誠之德著於四方者是已非謂在已之德亦待積而後成也故章末引文王之詩以證之夫豈積累漸次之謂哉若如呂氏之說則是因無息然後至於誠由不已然後純於天道也失其旨

矣

案呂氏曰雖天之大昭昭之多而已雖地之廣撮土之多而已山之一卷水之一勺亦猶是矣

其所以高明博厚神明不測者積之之多而已今夫人之有良心也莫非受天地之中是為可欲之善不充之則不能與天地相似而至乎大大而不化則不能不勉不思與天地合德而至於聖然所

以至于聖者充其良心德盛仁熟而後爾也故曰  
過此以往未之或知也窮神知化德之盛也如指  
人之良心而責之與天地合德猶指撮土而求其  
載華岳振河海之力指一勺而求其生蛟龍殖貨  
財之功是亦不思之甚也。語錄曰諸家多將此  
章做進德次第說只一箇至誠已該了豈復有許  
多節

楊氏動以天故無息之語甚善

案楊氏曰誠自成非有假

於物也而其動以天故無息

其曰天地之道聖人之德無二致

焉故方論聖人之事而又曰天地之道可一言而

盡蓋未覺其語之更端耳

案楊氏曰積而至於博厚高明則覆載成物之

能事備矣其用則不可得而見也故配天地無疆言之所以著明之也然天地之道聖人之德其為

覆載成物之功則無二致焉故又曰天地之道可一言而盡也所謂一言者誠而已互相明也精一而不二故能生物不測不誠則無物矣至謂天之所以為天文王之

所以為文皆原於不已則亦猶呂氏之失也

案楊氏曰

誠之一言足以盡之不息之積也若夫擇善而不能固執之若存若亡而欲與天地合德其可乎故又體之天之所以為天文王之所以為文皆原於不已大抵聖賢之言內外

精粗各有攸當而無非極致近世諸儒乃或不察乎此而於其外者皆欲引而納之於內於其粗者皆欲推而致之於精若致曲之明動變化此章之

博厚高明蓋不勝其繁碎穿鑿而於其本指失之  
愈遠學者不可不察也

大哉聖人之道

包下文兩節而言

語錄曰只章首  
便分兩節來

洋洋乎發育萬物峻極於天

峻高大也此言道之極於至大而無外也

陳氏曰此  
一節言道

體之大處流動充滿乎天地之間而  
無所不在蓋極於至大而無外也

優優大哉禮儀三百威儀三千

優優充足有餘之意

文集曰問以優優大哉冠於禮儀之上者蓋言道體之大散於

禮儀之末者禮儀經禮也

愚謂如冠昏喪祭朝覲會同之類

威儀曲

禮也

愚謂如進退升降俯仰揖遜之類

此言道之入於至小而無間

也

陳氏曰此一節言道體之小處雖三千三百之儀而無物不有蓋入於至小而無間也

待其人而後行

總結上兩節

陳氏曰道之大處小處皆須待其人而後行

故曰苟不至德至道不凝焉

至德謂其人至道指上兩節而言也

文集曰大抵發育峻極三十三

百皆至道其人

則至德之人也

黃氏曰天地間有這箇物事自家要凝他須有

此德凝是自

家去聚他

故君子尊德性而道問學致廣大而盡精微極高明而道中庸溫故而知新敦厚以崇禮

尊者恭敬奉持之意德性者吾所受於天之正理道

由也溫猶燖溫之溫

愚謂燖火熟物也

謂故學之矣復時習

之也敦加厚也尊德性所以存心而極乎道體之大

也道問學所以致知而盡乎道體之細也

語錄曰道之為體其



大無外其小無內無一物之不在焉故君子之學既能尊德性以全其大便須道問學以盡其小。黃氏曰存心則一念存萬理具致知則逐物皆當理會 二者脩德凝道之大端也

陳氏曰此說修德凝道工夫

不以一毫私意自蔽

語錄曰謂心脩開闊無此疆彼

界之

不以一毫私欲自累

語錄曰謂無一毫人欲之私以累於己纔汨於人欲

便卑汙矣。或疑不以一毫私意自蔽若可以移解高明不以一毫私欲自累若可以移解廣大愚謂雖總說尊德性亦有先後之序意者萌動之始止可言蔽一為意所蔽則廣大處已被窒塞了欲則不止於意而為物所累無所謂涵泳乎其所已知語錄高明者矣所以止可言自累涵泳乎其所已知語錄涵養此已知底敦篤乎其所已知陳氏曰加之篤道理常在我也厚便守得有力此

皆存心之屬也

陳氏曰此皆存心以極乎道體之大也

析理則不使有

毫釐之差

語錄曰須是從灑掃應對進退問答色色留意。陳氏曰是講究理義毫分縷析不

可有一髮之差處事則不使有過不及之謬

語錄曰是事事件件理會得到

一箇恰好處無些過與不及

理義則日知其所未知

語錄曰如今日讀這一段

所得如此明日讀這一段所得又如

此兩日之間所讀同而所得不同節文則日謹其

所未謹

語錄曰纔說一箇禮字便有許多節文

此皆致知之屬也

陳氏曰此

皆致知以極道體之細也

蓋非存心無以致知而存心者又不可

以不致知故此五句大小相資首尾相應

語錄曰此便是互相

為用處尊德性至敦厚此上一截便是渾淪處道問學至崇禮此下一截便是詳密處道體之大處直是難守細處又難窮究若有上面一截而無下面一截只管道是我渾淪更不務致知如此則茫然無覺若有下面一截而無上面一截只管要纖悉皆知更不去行如此則又空無所寄 聖賢所示入德之方莫詳於此學者宜盡心焉

是故居上不驕為下不倍國有道其言足以興國無道

其默足以容詩曰既明且哲以保其身其此之謂與

倍與

背同與

平聲

興謂興起在位也

語錄曰如興賢能之興

詩大雅烝民之篇

右第二十七章

言人道也

或問二十七章之說曰程張備矣

程子曰自大哉聖人之道至

道不疑焉皆是一貫。又曰德性者言性之可貴與言性善其實一也。又曰須是合內外之道一天人齊上下學而上達極高明而道中庸。又曰極高明而道中庸非二事中庸天理也天理固高明不極乎高明不足以道中庸中庸乃高明之極也。又曰理則極高明行之只是中庸也。張子曰天體物而不遺猶仁體事而無不在也禮儀三百威儀三千無一物之非仁也昊天曰明及爾出王昊天曰旦及爾游衍無一物之不體也。又曰不尊德性則問學從而不道不致廣大則精微

無所立其誠不極高明則擇乎中庸失時措之宜  
矣。又曰尊德性猶據於德德性須尊之道行也  
問問得者學行得者凝學問也尊德性須是將前  
言往行所聞所知以參驗恐行有錯致廣大須盡  
精微不得鹵莽極高明須道中庸之道。又曰致  
廣大極高明此則儘遠大所處則直是精約。又  
曰溫故知新多識前言往行以畜德繹舊業而知  
新益思昔未至而今至之緣舊所見聞而察來皆  
其義也。張子所論逐句為義一條甚為切於文義。  
張案

子曰尊德性而道問學致廣大而盡精微極高  
明而道中庸皆逐句為一義上言重下語輕。故

呂氏因之

案呂氏曰道之在我者德性而已不先  
貴乎此則所謂問學者不免乎口耳為

人之事而已道之全體者廣大而已不先充乎此  
則所謂精微者或偏或隘矣道之上達者高明而

已不先止乎此則所謂中庸者同汗合俗矣

然須更以游揚二說足之

則其義始備耳

案游氏曰懲忿窒慾閑邪存誠此尊德性也非學以聚之問以辨之

則擇善不明矣故繼之以道問學尊德性而道問學然後能致廣大尊其所聞行其所知充其德性之體使無不該備此致廣大也非盡精微則無以極深而研幾故繼之以盡精微致廣大而盡精微然後能極高明始也未離乎方今則無方矣始也未離乎體今則無體矣離形去智廓然大通此極高明也非道中庸則無踐履可據之地不幾於蕩而無執乎故繼之以道中庸高明者中庸之妙理而中庸者高明之實德也其實非兩體也○楊氏曰尊德性而後能致廣大致廣大而後能極高明道學問而後能盡精微盡精微而後能擇中庸而固執之入德之序也○愚謂張子言逐句為義呂

氏因之游氏以逐句相承接為說楊氏以逐句上一節承上一節下一節承下一節為說兼而讀之其義始備游氏分別至道至德為得之唯優優大哉之

說為未善

案游氏曰發育萬物峻極于天至道之功也禮儀三百威儀三千至道之具也

洋洋乎言上際於天下蟠於地也優優大哉言動容周旋中禮也夫以三百三千之多儀非天下至誠孰能從容而盡中哉故曰待其人而後行蓋盛德之至者人也故曰苟不至德至道不疑焉至德非他至誠而已矣而以無方無體離形去智為極高明之

意

見上注

又以人德地德天德為德性廣大高明之

分則其失愈遠矣

案游氏曰尊其德性而道問學人德也致廣大而盡精微地德

也極高明而道中庸天德也自人之天則上達矣

楊氏之說亦不可曉蓋

道者自然之路德者人之所得故禮者道體之節  
文必其人之有德然後乃能行之也今乃以禮為  
德而欲以凝夫道則既誤矣而又曰道非禮則蕩  
而無止禮非道則梏於儀章器數之末而有所不  
行則是所謂道者乃為虛無恍惚元無準則之物  
所謂德者又不足以凝道而反有所待於道也其  
諸老氏之言乎誤益甚矣

案楊氏曰道之峻極于天道之至也無禮以範



國之則蕩而無止而天地之化或過矣禮儀三百威儀三千所以體道而範圍之也故曰苟不至德至道不疑焉所謂至德者禮其是乎夫禮天所秩也後世或以為忠信之薄或以為偽皆不知天者也故曰待其人而後行蓋道非禮不止禮非道不行二者常相資也苟非其人而格於儀章焉數之未則愚不肖者之不及也尚何至道之凝哉

溫故而知新敦厚以崇禮諸說但以二句相對明其不可偏廢大意固然然細分之則溫故然後有以知新而溫故又不可不知新敦厚然後有以崇禮而敦厚又不可不崇禮此則諸說之所遺也大抵此五句承章首道體大

小而言故一句之內皆具大小二意如德性也廣大也高明也故也厚也道之大也問學也精微也中庸也新也禮也道之小也尊之道之致之盡之極之道之溫之敦之崇之所以脩是德而凝是道

也

語錄曰問溫故恐做不得大看曰就知新言之便是新來方理會得那枝分節解底舊來已見

得大體與他溫尋去亦有大小之意。黃氏曰至道大也有小也有至德大也盡小也盡君子所以貴修德尊德性是修大德便凝得大道道問學是修小德便凝得小道

以其於道之

大小無所不體故居上居下在治在亂無所不宜

此又一章之通旨也

子曰愚而好自用賤而好自專生乎今之世反古之道

如此者裁及其身者也

好去聲裁古灾字

以上孔子之言子思引之反復也

語錄曰以下文觀之非不師古之謂

也○陳氏曰謂生今之世而欲復古之道

非天子不議禮不制度不考文

此以下子思之言禮親疏貴賤相接之體也

愚謂如有虞氏

貴德而尚齒夏后氏貴尊而尚齒商人貴爵而尚齒周人貴親而尚齒之類

度品制

愚謂如虞

書同律度量衡之類下

文車同軌亦其一也

文書名

語錄曰如大字喚做大字上字喚做上字

下字喚做下字此之謂書名是那字底名。又曰古者人不甚識字字易得差所以每歲一番使大行人之屬巡行天下考過

這字是正與不正

今天下車同軌書同文行同倫

行去聲

今子思自謂當時也軌轍迹之度

陳氏曰古之造車依在地之轍迹而

為倫次序之體

語錄曰次序如等威節文之類體如辨上下定民志君臣父子貴賤尊卑

相接之體皆是天子制此禮通天下共行之故其次序之體等威節文皆如一也

三者皆同

言天下一統也

雖有其位苟無其德不敢作禮樂焉雖有其德苟無其位亦不敢作禮樂焉

鄭氏曰言作禮樂者必聖人在天子之位

子曰吾說夏禮杞不足徵也吾學殷禮有宋存焉吾學周禮今用之吾從周

此又引孔子之言杞夏之後徵證也宋殷之後三代之禮孔子皆嘗學之而能言其意但夏禮既不可考證殷禮雖存又非當世之法惟周禮乃時王之制今

曰所用孔子既不得位則從周而已

右第二十八章

承上章為下不倍而言亦人道也

或問子思之時周室衰微禮樂失官制度不行於天下久矣其曰同軌同文何耶曰當是之時周室雖衰而人猶以為天下之共主諸侯雖有不臣之心然方彼此爭雄不能相尚下及六國之未亡猶未有能更姓改物而定天下于一者也則周之文

軌孰得而變之哉

三山陳氏曰案魯穆公元年子思作中庸蓋周威烈王之十七

年也是時列國雖強猶有周制

曰周之車軌書文何以能若是其

必同也曰古之有天下者必改正朔易服色殊徽號以新天下之耳目而一其心志若三代之異尚其見於書傳者詳矣軌者車之轍迹也周人尚輿而制作之法領於冬官其輿之廣六尺六寸故其轍迹之在地者相距之間廣狹如一無有遠邇莫不齊同凡為車者必合乎此然後可以行乎方內

而無不通不合乎此則不惟有司得以討之而其  
行於道路自將偏倚虺隤而跬步不前亦不待禁  
而自不為矣古語所謂閉門造車出門合轍蓋言  
其法之同而春秋傳所謂同軌畢至者則以言其  
四海之內政令所及者無不來也文者書之點畫  
形象也周禮司徒教民道藝而書居其一又有外  
史掌達書名於四方而大行人之法則又每九歲  
而一喻焉其制度之詳如此是以雖其末流海內



分裂而猶不得變也必至於秦滅六國而其號令  
法制有以同於天下然後車以六尺為度書以小  
篆隸書為法而周制始改爾孰謂子思之時而遽

然哉

三山陳氏曰秦吞併後始用六為紀而與六尺是改車之軌損於周者六寸矣又命李斯

程邈更制小篆隸書而後書之文始不同

王天下有三重焉其寡過矣乎

王去聲

呂氏曰三重謂議禮制度考文惟天子得以行之則  
國不異政家不殊俗而人得寡過矣

上焉者雖善無徵無徵不信不信民弗從下焉者雖善不尊不尊不信不信民弗從

上焉者謂時王以前如夏商之禮雖善而皆不可考

下焉者謂聖人在下如孔子雖善於禮而不在尊位

也

三山陳氏曰上乎周而為夏商禮非不善然既於今而無所證則民將駭而不信矣下而不獲用於

周如孔子者德非不善然不得顯位以行之則民亦玩而不信矣

故君子之道本諸身徵諸庶民考諸三王而不繆建諸天地而不悖質諸鬼神而無疑百世以俟聖人而不惑

此君子指王天下者而言其道即議禮制度考文之

事也

語錄曰君子指在上之人上章言雖有其德苟無其位不敢作禮樂就那身上說只做得那般

事看本諸身有其德也徵諸庶民驗其所信從也建立也

立於此而參於彼也天地者道也

語錄曰問以上下文例之此天

地似乎有形氣之天地蓋建諸天地之間而其道不悖於我也曰此天地只是道耳謂吾建於此而於道不相悖也鬼神者造化之迹也百世以俟聖人而不惑所

謂聖人復起不易吾言者也

質諸鬼神而無疑知天也百世以俟聖人而不惑知人

也

知天知人知其理也

陳氏曰鬼神天理之至也聖人  
人道之至也惟知天理之至所

以無疑惟知人道  
之至所以不惑

是故君子動而世為天下道行而世為天下法言而世  
為天下則遠之則有望近之則不厭

動兼言行而言道兼法則而言法法度也則準則也

潘氏曰行有成迹故可效法言只言其理如  
此未有事迹之可言必在人準則而推行之

詩曰在彼無惡在此無射庶幾夙夜以永終譽君子未

有不如如此而蚤有譽於天下者也

惡去聲射音姑詩作斃

詩周頌振鷺之篇射厭也所謂此者指本諸身以下

六事而言

### 右第二十九章

承上章居上不驕而言亦人道也

或問二十九章之說曰三重諸說不同雖程子亦

因鄭注然於文義皆不通

案程子曰三重即三王之禮此即鄭注之說

唯呂氏一說為得之耳至於上下焉者則呂氏亦

失之惜乎其不因上句以推之而為是矛盾也

案呂氏曰

上焉謂上達之事如性命道德之本不驗之於民之行事則徒言而近於荒唐下焉者謂下達之事如刑名度數之末隨時變易無所稽考則臆見而出於穿鑿二者皆無取信於民是以民無所適從

曰然則上焉者以時言下焉者以位言宜不得為一說且又安知下焉者之不為霸者事耶曰以王天下者而言則位不可以復上矣以霸者之事而言則其善又不足稱也亦何疑哉曰此章文義多近似而若可以相易者其有辨乎曰有三王以迹

言者也故曰不謬言與其已行者無所差也

陳氏曰謂

考質諸三王驗其所已行之迹而不差繆

天地以道言者也故曰不悖

言與其自然者無所拂也

陳氏曰謂立諸天地之間順其自然之理而不

違悖

鬼神無形而難知故曰無疑謂幽有以驗乎明

也後聖未至而難料故曰不惑謂遠有以驗乎近

也

潘氏曰通天下一理耳無往不在無時不然是以達幽明貫古今而無所不通

動舉一

身兼行與言而言之也道者人所共由兼法與則

而言之也法謂法度人之所當守也則謂準則人

之所取正也遠者悅其德之廣被故企而慕之近者習其行之有常故久而安之也

仲尼祖述堯舜憲章文武上律天時下襲水土

祖述者遠宗其道憲章者近守其法

陳氏曰堯舜人道之極故宗之

法度至周而簡故守之

律天時者法其自然之運襲水土者因

其一定之理

陳氏曰天時者春夏秋冬之四時有自然之運故聖人法之水土者東西南北

之四方各有一定之理故聖人因之

皆兼內外該本末而言也

語錄曰兼本末

內外精粗而言是言聖人功夫。永嘉陳氏曰祖述者道法在其中憲章者法道在其中律天時者大則



顯晦屈伸襲水土者小則採山釣水  
細底道理為本為內藏底為末為外

辟如天地之無不持載無不覆幬辟如四時之錯行如

日月之代明

辟音譬情  
徒報反

錯猶迭也此言聖人之德

葉氏曰是述夫子  
之德同乎天也

萬物並育而不相害道並行而不相悖小德川流大德  
敦化此天地之所以為大也

悖猶背也天覆地載萬物並育於其間而不相害

陳氏

曰天無不覆地無不載大化流行萬物止其所而  
不相侵害。潘氏曰無不覆載者廣大之體也

四

時日月錯行代明而不相悖

陳氏曰四時錯行日月代明一寒一暑一晝一

暮似乎相反而其實非相違悖。潘氏曰錯行代明者變通之用也。

所以不害不悖者小德之川流

所以並育並行者大德之敦化

語錄曰大德是敦那化底小德是流出那敦化底出

來這便如忠便是做那恕底恣便是流出那忠來底如中和中便是大德敦化和便是小德川流自古亘今都只是這一箇道理小德者全體之分大德者萬殊之本

黃氏

曰大德是心之本體無許多大底亦做不得小底出來

川流者如川之流脈絡

分明而往不息也敦化者敦厚其化根本盛大而出

無窮也

葉氏曰川流者言如川之流有支有派觸處彌滿流行不已也敦化者言蘊蓄妙理深厚

盛大其來無端  
莫窺其自也

此言天地之道以見上文取辟之意

也

語錄曰是言天地之大如此言天地則見聖人矣

### 右第三十章

言天道也

或問小德大德之說曰以天地言之則高下散殊者小德之川流於穆不已者大德之敦化以聖人言之則物各付物者小德之川流純亦不已者大德之敦化以此推之可見諸說之得失矣

陳氏曰大德是

就造化渾淪大本處論造化之大本處敦厚則根本盛大其出也流行而不窮小德是就造化中間條貫處細碎論造化之生成其條理如川水之流脈絡分明而晝夜之流不息若以天地言則萬物之或高或下或散或殊者小德之川流維天之命於穆不已者大德之敦化若以本文言之則萬物有許多種類各正其所而不相害四時日月之運行而不相悖是小德之川流天地覆載而萬物並育四時日月其道並行是大德之敦化此說天地之道所以為大而孔子之德所以取譬於斯

曰子之所謂兼內外該本末而言者何也曰是不可以一事言也姑以夫子已行之迹言之則由其書之有得夏時贊周易也由其行之有不時不食

也迅雷風烈必變也以及於仕止久速之皆當其可也而其所以律天時之意可見矣由其書之有序禹貢述職方也由其行之有居魯而逢掖也居宋而章甫也以及於用舍行藏之所遇而安也而其襲水土之意可見矣若因是以推之則古先聖王之所以迎日推策頒朔授民而其大至於禪授放伐各以其時者皆律天時之事也其所以體國經野方設居方而廣至於昆蟲草木各遂其性者

皆襲水土之事也使夫子而得邦家也則亦何嫌於是哉

唯天下至聖為能聰明睿知足以有臨也寬裕溫柔足以有容也發強剛毅足以有執也齊莊中正足以有敬也文理密察足以有別也

知去聲齊側皆反別彼列反

聰明睿知生知之質

陳氏曰聰明睿智者聖人生知安行之資蓋首出庶物者也聰

是耳之所聽無不聞明是目之所視無不見睿是無所不通知是無所不知聰明以耳目言睿知以心言

臨謂居上而臨下也

語錄曰且如臨一人須是強得那一人方得至於百人千人萬

人皆然若臨天下便須臨得天下方得

其下四者乃仁義禮知之德

陳氏

曰寬是寬大裕是優裕溫和而柔順此仁也仁則度量寬洪廣大故曰有容發是奮發強是強而有力剛毅皆剛意此義也義則操執得牢固故曰有執齊是齊嚴莊是端莊中則無過不及正則不偏此言禮也故曰有敬文理密察

文文章也

語錄曰如物之文縷陳氏曰是燦然而

此知也故曰有別

有文理條理也

語錄曰理是有條辨逐一路子以各章有條謂之理。又曰如竹木之文理

相似直是一般

密詳細也

語錄曰此是聖人於至纖至悉處無不詳審且如一

物初破作兩箇又破作四片若未恰好又破作八片只管詳密

察明辨也

陳氏曰謂足以分別

物事

溥博淵泉而時出之

溥博周徧而廣闊也淵泉靜深而有本也

語錄曰溥周徧博宏

大淵深沈泉便有箇發達不已底意

出發見也言五者之德充積於中

而以時發見於外也

溥博如天淵泉如淵見而民莫不敬言而民莫不信行

而民莫不說

見音現說音悅

言其充積極其盛

陳氏曰此言上二句

而發見當其可也

陳氏曰此

言下三句。愚謂當其可即合理之謂也見是方出而未形於言行之間如下章所謂不動而敬不言而



信是也下面  
方分言行

是以聲名洋溢乎中國施及蠻貊舟車所至人力所通  
天之所覆地之所載日月所照霜露所隊凡有血氣者

莫不尊親故曰配天

施去聲  
隊音墜

舟車所至以下蓋極言之配天言其德之所及廣大  
如天也

右第三十一章

承上章而言小德之川流亦天道也

唯天下至誠為能經綸天下之大經立天下之大本知

天地之化育夫焉有所倚

夫音扶焉於虔反

經綸皆治絲之事經者理其緒而分之綸者比其類

而合之也

語錄曰治絲者先須逐條理其頭緒而分之所謂經也然後比其類而合之如打絲

者必取所分之緒比類而合為一所謂綸也。陳氏曰一是分疏條理一是牽聯相合

經常也

大經者五品之人倫

陳氏曰即君臣父子兄弟夫婦朋友之大倫

大本者

所性之全體也

陳氏曰即是中者天下之大本一般中乃未發之中就性論今所謂大本

以所性之全體論

惟聖人之德極誠無妄故於人倫各盡其

當然之實而皆可以為天下後世法所謂經綸之也

陳氏曰如君是君臣是臣父是父子是子兄是兄弟是弟夫是夫婦是婦各有條理一定而不亂故曰經如君臣之相敬父子之相親夫婦之相倡和兄弟之相友睦朋友之相切磋琢磨磨牽比其倫類自然相合故曰綸惟聖人極誠無妄於人倫各盡其所當然之實皆可以為天下後世之標準如使契教人倫蓋吾身已有箇標準故人皆取法之其於所性之全體無一毫人欲之偽

以雜之而天下之道千變萬化皆由此出所謂立之

也陳氏曰聖人於所性之全體初無一毫人欲之雜及發而應事接物千條萬緒千變萬化皆從大本

中流出其本根所在甚宏其於天地之化育則亦其大非誠極其至不能立之

極誠無妄者有默契焉非但聞見之知而已

語錄曰天地化

育如春夏秋冬日月寒暑無一息之差知化者真知其必然所謂知者至誠無偽有以默契也。陳氏曰知字不可以聞見之知論只如肝膽相照一般聖人之德極誠無妄其生育變化萬物之功與天地造化

胎合交契渾融一體所謂知也

此皆至誠無妄自然之功用夫豈有

所倚著於物而後能哉

語錄曰堂堂然流出夫焉有倚靠

肫肫其仁淵淵其淵浩浩其天

肫之純反

肫肫懇至貌以經綸而言也

陳氏曰經綸大經須加懇切詳細之功不可有

急迫操切之意淵淵靜深貌以立本而言也

陳氏曰靜深則有根本而不竭

故以立  
本言

浩浩廣大貌以知化而言也

陳氏曰此誠之體與天同其大

故其生育變化與天  
同其功故以知化言

其淵其天則非特如之而已

永嘉

陳氏曰如天如淵猶是二物  
其天其淵即聖人便是天淵

苟不固聰明聖知達天德者其孰能知之

聖知之  
知去聲

固猶實也鄭氏曰唯聖人能知聖人也

語錄曰問上  
面聖人是人

下面聖人是聖人之道曰亦是人也惟有其人而後  
至誠之道乃始實見耳。陳氏曰非若此等人則不  
能知得  
此等事

## 右第三十二章

承上章而言大德之敦化亦天道也前章言至聖之德此章言至誠之道然至誠之道非至聖不能知至聖之德非至誠不能為則亦非二物

矣

語錄曰至聖至誠只是以表裏言至聖是其德之發見乎外者至誠則是那裏而骨子至

誠處非聖人不自知至聖則外人只見得到這處或曰至誠至聖亦可以體用言否曰體用也不相似只是說得表裏○葉氏曰至聖指發用神妙而言仍上文小德川流之意至誠指大經大本之實理而言仍上文大德敦化之意非至聖無以顯至誠之全體非至誠無以全至聖之妙用其實非二物也○永嘉陳氏曰聖者靈通變化之稱人道之極功誠者真實無妄之謂與

天合德也經中凡說天德處必曰此篇言聖人至誠凡論人倫之至處必曰至聖

天道之極致至此而無以加矣

或問至聖至誠之說曰楊氏以聰明睿智為君德者得之而未盡其寬裕以下則失之蓋聰明睿智者生知安行而首出庶物之姿也容執敬別則仁

義禮智之事也

案楊氏曰書曰惟天生聰明時又易曰知臨大君之宜吉則聰明睿

智人君之德也故足以有臨寬裕溫柔仁之質也故足以有容發強剛毅以致果故有執齊莊中正以直內故有敬文理密察理於義也故有別。語錄曰問理於義也曰便是怕如此說這一句了未

得又添一句  
都不可曉  
經綸以下諸家之說亦或得其文義

但不知經綸之為致和立本之為致中知化之為窮理以至於命且上於至誠者無所繫下於焉有所倚者無所屬則為不得其綱領耳游氏以上章

為言至聖之德下章為言至誠之道者得之

葉游氏曰

聰明睿智聖德也寬裕溫柔仁德也發強剛毅義德也齊莊中正禮德也文理密察智德也溥博者其大無方淵泉者其深不測或容以為仁或執以為義或敬以為禮或別以為智惟其時而已此所謂時出之也夫然故外有以正天下之觀內有以通天下之志是以見而民敬言而民信行而民悅



自西自東自南自北莫不心悅而誠服此至聖之德也天下之大經五品之民彛也凡為天下之常道皆可名於經而民彛為大經經綸者因性循理而治之無汨其序之謂也立天下之大本也建中于民也淵淵其淵非特如淵而已浩浩其天非特如天而已此至誠之道也

其說自德

者其用以下皆善

案游氏曰德者其用也有目者所共見有心者所共知故凡有

血氣者莫不尊親道者其本也非道同志一莫窺其與故曰苟不固聰明聖知達天德者其孰能知之蓋至誠之道非至聖不能知至聖之德非至誠不能為故其言之序相因如此

詩曰衣錦尚絀惡其文之著也故君子之道闇然而曰章小人之道的然而曰亡君子之道淡而不厭簡而文

溫而理知遠之近知風之自知微之顯可與入德矣

去

聲絅口迴反惡  
去聲闇於惑反

前章言聖人之德極其盛矣此復自下學立心之始

言之而下文又推之以至其極也

葉氏曰上三章極言孔子體天之德

與夫至聖至誠之功用中庸之道至矣盡矣子思又慮學者馳騁於高遠而忘下學之功夫而或失其指歸故此章總論必自下學務內至親至切言之然後極於至精至微不可擬議之地

詩國風衛

碩人鄭之丰皆作衣錦褻衣褻絅同禪衣也

語錄曰古註以

為禪衣所以褻錦衣者問禪與單字同異曰同沈括謂絅與褻同是用褻麻織疏布為之不知是否尚

加也

陳氏曰衣錦而加絢衣以蔽之

古之學者為己故其立心如此

黃氏曰惡其文之著此君子之立心如此

尚絢故闇然衣錦故有日章之

實

語錄曰只暗暗地做工夫處這理自掩蔽不得。陳氏曰衣錦者美在其中尚絢者不求知於外古

之學者只欲此道理實得於己不是欲求人知惟其不求人知所以闇然雖曰闇然而道理自彰著而不

可拚猶衣錦尚絢而錦之

文采自然著見於外也 淡簡溫絢之襲於外也不

厭而文且理焉錦之美在中也

語錄曰淡則必厭簡則不文溫則不理而

今却不厭而文且理只緣有錦在裏面若止著布衫著布襖便都內外黑淬淬地

小人反是

則暴於外而無實以繼之是以的然而日亡也

語錄曰小

人不曾做時已報得滿  
他人知然實不曾做得遠之近見於彼者由於此也

語錄曰是以已對物言之知  
在彼之是非由在我之得失風之自著乎外者本乎

內也  
語錄曰是知其身之  
得失由乎心之邪正微之顯有諸內者形諸外

也  
語錄曰專指  
有為已之心而又知此三者則知所

謹而可入德矣  
陳氏曰君子立心只是為已而又能  
知道理之見於遠者自近始故自近

而謹見於風化者自身始故自身而謹有諸內者甚  
微而著於外者甚顯故自微而謹既知此三者而有

所謹則可與  
之入德矣  
故下文引詩言謹獨之事

詩云潛雖伏矣亦孔之昭故君子內省不疚無惡於志

君子之所不可及者其唯人之所不見乎

聲 惡去

詩小雅正月之篇承上文言莫見乎隱莫顯乎微也

疾病也無惡於志猶言無愧於心此君子謹獨之事

也

陳氏曰正月詩潛雖伏矣即首章隱微處亦孔之昭即首章莫見莫顯意言隱伏之間其理甚昭明

君子內省此處須是無一毫疾病如此則無愧於心君子所以不可及者只是能於人所不知而已獨知之地致其謹耳

詩云相在爾室尚不愧於屋漏故君子不動而敬不言

而信

相去聲

詩大雅抑之篇相視也屋漏室西北隅也

文集曰曾子問謂之

當室之白孫炎曰當室日光所漏入也。語錄曰古人室在東南隅開門東北隅為窻西北隅為屋漏西南為奧人纔進便先見東北隅却到西北隅然後始到西南隅此是至深密之地

承上文又

言君子之戒謹恐懼無時不然不待言動而後敬信

陳氏曰抑詩即是首章戒謹其所不睹恐懼其所不聞意屋隅人迹所不到之地此處蓋已之所不睹須是真實無妄常加戒謹恐懼方能無愧怍君子為已之功至此不待於動而應事接物方始敬蓋於未應接之前無人處已無非敬矣不待見於發言而後信實蓋於未發言之前本來真實無非信矣則其為已之功益加密矣

陳氏曰此處一節密一節首章先說戒謹恐懼後說謹獨是自

密而疎蓋從內面發出來此處先說謹獨後說戒謹恐懼是自疎而密蓋從外面說入

故下文

引詩并言其效

詩曰奏假無言時靡有爭是故君子不賞而民勸不怒

而民威於鈇鉞

假格同  
鈇音夫

詩商頌烈祖之篇奏進也承上文而遂及其效言進

而感格於神明之際極其誠敬無有言說而人自化

之也

陳氏曰所以不待賞而民自勸不待怒而民自畏之

威畏也鈇莖斫刀也

鈇斧也

詩曰不顯惟德百辟其刑之是故君子篤恭而天下平  
詩周頌烈文之篇不顯說見二十六章此借引以為  
幽深玄遠之意承上文言天子有不顯之德而諸侯  
法之則其德愈深而效愈遠矣

文集曰不顯二字二十六章者別無他義

故只用詩意卒章所引緣自章首尚絅之云與章末無聲無臭皆有隱微深密之意故知其當別為一義與詩不同也。語錄曰問不顯其德案詩中例是言豈不顯也今借引此詩真作不顯說如何曰是箇幽深玄遠意是不顯中之顯篤厚也篤恭言不顯其敬也篤恭而天

下平乃聖人至德淵微自然之應中庸之極功也

語錄



曰此章列篤恭而天下平已是極處結局了他人孰不恭敬然却不能平天下聖人篤恭天下便平都不可測耳。陳氏曰文章至此凡五引詩頭節說學者須為已不求人知第二節說致謹於人所不見處第三節說不特人所不見雖已所不聞不見處亦當致敬第四節說不待言說而人自化之第五節說不顯篤恭聖人至德功效有自然之應乃中庸之極功也

詩云予懷明德不大聲以色子曰聲色之於以化民末也詩曰德輶如毛毛猶有倫上天之載無聲無臭至矣

輶由西

二音

詩大雅皇矣之篇引之以明上文所謂不顯之德者

正以其不大聲與色也

語錄曰只是說至德自無聲色

又引孔子之

言以為聲色乃化民之末務今但言不大之而已則

猶有聲色者存是未足以形容不顯之妙

三山陳氏曰是雖曰

不大聲與色然猶有聲色者存焉特不大之耳○蔡氏曰是猶未足以盡此理之妙

不若烝民

之詩所言德輶如毛則庶乎可以形容矣而又自以

為謂之毛則猶有可比者是亦未盡其妙

三山陳氏曰苟謂之

如毛是尚容比類也○蔡氏曰是亦未足以盡此理之妙

不若文王之詩所言上

天之載無聲無臭然後乃為不顯之至耳蓋聲臭有

氣無形在物最為微妙而猶曰無之故唯此可以形

容不顯篤恭之妙

語錄曰所謂不顯其德者幽深玄遠無可得而形容雖不大聲以色

德猶如毛皆不足以形容直是無聲無臭到無迹之可尋然後已

非此德之外又別

有是三等然後為至也

陳氏曰非是德之外又別有三等級如此

右第三十三章子思因前章極致之言反求其本

復自下學為己謹獨之事推而言之以馴致乎篤

恭而天下平之盛又贊其妙至於無聲無臭而後

已焉

語錄曰中庸後面愈說得向裏來凡八引詩一步退似一步都用那般不言不動不顯不

大底字直說到無聲無臭則至矣或曰到此裏還得本體曰然。又曰此段自衣錦尚絅間然日章漸漸收斂到後面一段密似一段直

到聖而不可知處曰無聲無臭至矣

蓋舉一篇之

要而約言之其反復丁寧示人之意至深切矣學者其可不盡心乎

或問卒章之說曰承上三章既言聖人之德而極其盛矣子思懼夫學者求之於高遠玄妙之域輕自大而反失之也故反於其至近者而言之以示入德之方欲學者先知用心於內不求人知然後

可以謹獨誠身而馴致乎其極也君子篤恭而天下平而其所以平者無聲臭之可尋此至誠盛德自然之效而中庸之極功也故以是而終篇焉蓋以一篇而論之則天命之性率性之道修道之教與夫天地之所以位萬物之所以育者於此可見其實德以此章論之則所謂淡而不厭簡而文溫而理知遠之近知風之自知微之顯者於此可見其成功皆非空言也然其所以入乎此者則無他

焉亦曰反身以謹獨而已矣故首章以發其意此章又申明而極言之其旨深哉其曰不顯亦充尚絅之心以至其極耳與詩之訓義不同蓋亦假借而言若大學敬止之例也諸說如何曰程子至矣

案程子曰不愧屋漏便是箇持敬氣象。又曰不愧屋漏則心安而體舒。又曰尚不愧于屋漏是敬之事。又曰聖人修己以安百姓篤恭而天下平惟上下一於恭敬則天地自位萬物自育氣無不和四靈何有不至此體信達順之道聰明睿智皆由此出以此事天享帝。又曰道一本也知不二本便是篤恭而天下平之道。又曰君子之遇事無巨細一於敬而已矣簡細故以自崇非敬也

飾私智以為奇非敬也要之無敢慢而已語曰居處恭執事敬雖之夷狄不可棄也然則執事敬者固為仁之端也推是心而成之則篤恭而天下平矣。又曰毛猶有倫入毫釐絲忽終不盡。又曰中庸言道只消道無聲無臭四字總括了多少。又曰中庸之語其本於無聲無臭其用至於禮儀三百威儀三千自禮儀三百威儀三千復歸於無聲無臭此言聖人心要處

呂氏既失

其章旨又不得其綱領條貫而於文義尤多未當如此章承上文聖誠之極致而反之以本乎下學之初心遂推言之以至其極而後已也而以為皆言德成反本之事則既失其章旨矣

案呂氏曰此章皆言德成

反本以盡此章凡八引詩自衣錦尚絅以至不顯中庸之道

惟德凡五條始學成德疎密淺深之序也自不大聲色以至無聲無臭凡三條皆所以贊夫不顯之德也今以不顯惟德通前三義而并言之又以後三條者亦通為進德工夫淺深次第則又失其條

理矣

案呂氏曰不顯惟德百辟其刑之者蓋要其所以不動而敬不言而信不賞而勸不怒而

威豈有他哉在德而已○又曰德輶如毛謂之德者猶誠之者也未至乎誠也若至乎誠則與天為一無意無我非勉非思渾然不可得而名者也聲臭之於形微矣有物而不可見猶曰無之則上天



之事可知矣。又曰不動而敬不言而信不費而勤不怒而威則德孚於人而忘乎言動矣然猶有德之聲色存焉至于不大聲色然後可以入乎無聲無臭而誠一於天

至以知風之

自為知見聞動作皆由心出

案呂氏曰以見聞之廣動作之利推所從

來莫非心之所出其知風之自歟

以知微之顯為知心之精微明

達暴著

案呂氏曰心之精微至隱至妙無聲無臭然其理明達暴著若懸日月其知微之顯

歟

以不動而敬不言而信為人敬信之

案呂氏曰其中有本

不待言動而人敬信

以貨色親長達諸天下為篤恭而天下

平

案呂氏曰君子之善與人同合内外之道則為德非持成已將以成物故君子言貨色之欲親

長之始必達於天下而後已  
豈非篤恭而天下平者哉

以德為誠之之事而

猶有聲色至於無聲無臭然後誠一於天

已見上註

則

又文義之未當者然也然近世說者乃有深取乎

其知風之自之說而以為非大程夫子不能言者

蓋習於佛氏作用是性之談而不察乎了翁序文

之誤耳學之不講其陋至此亦可憐也

語錄曰呂氏却是作

用是性之德於學無所統攝

游氏所謂無藏於中無交於物泊

然純素獨與神明居所謂離人而立於獨者皆非

儒者之言

案游氏曰無藏於中無交於物泊然純素獨與神明居此淡也然因性而已故

不厭。又曰無聲無臭則離人而立於獨矣

不失足於人不失色於人

不失口於人則又審於接物之事而非簡之謂也

案游氏曰不失足於人不失色於人不失口於人此簡也然循理而已故文

其論三知

未免牽合之病

案游氏曰欲治其國先齊其家知遠之近也人人親其親長其長而

天下平可不謂近矣乎欲齊其家先修其身知風之自也易於家人曰風自火出而君子以言有物行有常可不謂所自乎欲修其身先正其心知微之顯也夫道視之不見聽之不聞而常不離心術日用之間可不謂顯矣乎其論德輶如毛以下則其失與呂氏

同

業游氏曰所謂德者非甚高而難知也甚遠而難至也舉之則是故曰德輶如毛既已有所舉

矣則必思而得勉而中是人道而有對也故曰毛猶有倫若夫誠之至則無思無為從容中道是天

道也故曰上天之

載無聲無臭矣

楊氏知風之自

業楊氏曰世之流風皆有所自

清之隘和之不恭知其

與呂氏舊本之說略同

業呂

自此則君子不由也

氏曰墨子兼愛楊子為我其始未有害也其風之末則至於無君無父而近於禽獸伯夷之不屑就以為清柳下惠之不屑去以為和其風之末不免乎隘與不恭君子不由則其端不可不慎也故曰差之毫釐繆以千里其知風之自歟

而其取證又皆太遠要當參取

呂氏改本去其所謂見聞者而益以言語之得失

動作之是非皆知其有所從來而不可不謹則庶

乎其可耳

案呂氏見聞之說已見上註

以德輜如毛為有德而

未化則又呂游之失也

案楊氏曰德輜如毛未至於無倫猶有德也有而不

化非其至也故上天之

載無聲無臭然後為至

侯氏說多疎闊惟以此章

為再叙入德成德之序者獨為得之也

案侯氏曰自衣錦尚

絅至無聲無臭至矣子思

再叙入德成德之序也

中庸纂疏卷三